

Viaggiar sin sendas tematicas en il Grischun

La Terra Grischuna preschenta in vast spectrum da pussaivladads

■ (anr/gc) Adina puspè engartan ins sendas instructivas da viandar en il Grischun. Las pli veglias ed enconuschentas astgassan bain questas en il gaud esser, nua ch'ins chattava bleras indicaziuns davart plantas. Dentant è quest spectrum da vias d'eventimentar s'engrondi. Sco quai che la Terra Grischuna, che ha deditgà l'ediziun 3/2004 a quest tema, constatescha, datti en noss chantun pli che 50 sendas tematicas ni d'aventuras.

Insaquants interessants exempels

Georg Devonas dilucidescha co duas classas da la scola secundara d'Arosa han realisà sin territori communal ina ovra astronomica, numnadain ina via davart ils planets sin pli che 2 km. En mesira pli pitschna han els preschenta in vair maletg davart la grondezza e furma da noss sistem solar. – Sin il Corn Cotschen da Parpan dat ina via geografica slargiada invista multifara pertutgant il svilup da la cuntrada. Las 22 tablas, repartgidas sin l'entira ruta, cuntengnan bleras infurmaziuns da la cuntrada el l'ost da Lai sco quai che *Ralf Freund*, *Küsnacht/Lai* dilucidescha.

La Via Valtellina – tranter Tirano e Schruns el Montafon – n'è atgnamain betg ina senda tematica, mabain ina «via» davart la cultura dal vin ed il transport da quel tras ils berniers – sco quai



che *Arne Hegland*, Landquart, e *Hanspeter Schneider*, Berna, relatan. Quella è

vegnida iniziada l'onn 2000 da l'antier collavuratur da la Via Storia, *Hans-*

jürg Gredig – in project ch'è vegnì distinguì cun in premi.

Era per promover vacanzas en il Grischun

Ina pitschna «via d'aua» vegn realisada en la Val d'Alvra. Ins vegn a metter cuntrada, sanadad e cultura en novs connex e dar impuls, ina spezia dad acupuntura en la cuntrada. Quest eventiment descriva *Jara Ubricek*, Sagogn. Il project «Ansaina» ha – segund il president communal d'Alvagni, *Thomas Kollegger* – l'intent da dar a quai ch'è dà tras la natira ina valita. – In bun agid per Grischun-Vacanzas èn era Heidi e Globi. Uschia datti ina via da paraulas enta Samignun, la via d'aventuras da Flurina a Scuol, quella da Heidi a Maiavilla ed ina da Globi en la region da Lai. Oz tschertga la cuntrada – segund *Elisabeth Bardill* – ina istorgia, pia il cuntrari da quai ch'ins fageva antruras. – Si Surses exista la «Veia digl Pader». Quella consista cun 13 staziuns ord plets dal grond scribent surmiran pader Alexander Lozza (1880–1953). *Joachim Wasescha*, Savognin, descriva quai bain. Sper las poesias datti era da vesair natira, las atgnadads da la val e bels vitgs.

Ina da las pli bellas vias panoramicas sa chatta en l'Arena da las Alps – tranter Foppa e Scheia – cun Flem e sia culissa. Cun raschun numnan ins quella – sco quai che *Susi Klausner* descriva – era

«Via linguistica», essend ch'i sa tracta d'ina pussaivladad da leger ed emperender rumantsch. Sin 31 tabla è d'intervegnir blier davart la cultura, cultura e linguatg rumantsch. – Davent da la staziun da Son Murezzan fin sil Piz Nair maina la senda d'aventura che dat tar 18 staziuns infurmaziuns davart l'energia renovabla. Quai Clean Energy Tour è vegnì inaugurà avant gist in onn da cuss. fed. Calmy-Rey. La descripsiun è dad *Agi Fetz*.

Sin vias tut spezialas

Sper quella senda tematicas pli grondas dat la Terra Grischuna era in sguard sin pli pitschnas sco quella dad instrucziun «Protecziun-gaud-carstgaun» davent da l'Alp Grüm vers Poschiavo, sin culinaria e trail (activitads) a Flem, Laax e Falera, sin la pli lunga piazza da glatsch (skateline) da l'Europa en la Val d'Alvra (d'Alvagni-Bogn fin Surau), sin il sentiero Segantini a Maloja sco era sin la via si Claustra-Madrisa per eventimentar e sentir energias positivas e negativas.

Mintgacas vul questa ediziun da la Terra Grischuna buc mo far enconuschentas pliras vias tematicas e d'eventimentar, mabain era stimular da far diever da questas sendas tras excursiuns. Ultra da quai cuntengn quella revista per natira, cultura e temp liber anc numerusas contribuziuns e notizias ch'i vala la paina da leger.